

## TUSAGASSIUUTITIGUT NALUNAARUT



### **Nuummi aamma Ilulissani mittarfissat sanaartorneqarnissaannut isumaqatigiissutit isumaqatigiissutigineqarput**

Kalaallit Airports International A/S-ip aamma Munck Gruppen A/S-ip Nuummi aamma Ilulissani mittarfissat sanaartorneqarnissaat pillugu sanatitsisup sanaartortussallu akornanni isumaqatigiissutit pingaarnerit isumaqatigiissutigaa.

Mittarfiit marluusut tamarmik 2.200 meteriussapput, aammalu ILS-inik, eqqoqqissaartumik minnissamut atortunik, isikkivigippallaanngitsumi missinnaalersitsisussanik, taamaalillunilu mittarfinni piffissamik eqquisarnermik pitsaanerulersitsisussanik, atortulersugaassapput.

Nuummi aamma Ilulissani nunanit tamalaanit mittarfiit kiisalu Qaqortumi nunap immikkoortuani mittarfiup sananeqarnissaannut, ingerlanneqarnissaannut aningaasalersorneqarnissaannullu killiliussatut piumasaaqatit pillugit Inatsisartut inatsisaat nr. 4, 22. november 2018-imeersoq naapertorlugu aammalu tassani killissaliussat iluanni sanatitsisup sanaartortussallu akornanni isumaqatigiissutit isumaqatigiissutigineqarput.

Juulip qaammataani isumaqatigiissutissat pillugit isumaqatigiittoqareernerata kingorna Munck Gruppen A/S-ip mittarfiliassanut suliaassat marluk taakkua aallartinnissaat ingerlaannaq aallartippaa, aammalu sanaartornermik suliaqarnerpiaq pilersaarutit malillugit oktober 2019-imi aallartissaaq. Mittarfiit marluusut taakkua pilersaarutit malillugit 2023-ip naalernerani naammassissapput.

Mittarfinni marlunni taakkunani mittarfiit illutassai pilersaarutit malillugit 2020-imi neqeroortitsivigineqassapput, aammalu tassani ilaatinneqassallutik mittarfinni terminalit ullutsinnut naleqquttut nutaaliaasullu, nakkutigininnermut napasuliaq nutaaq aamma sullissinnermut illutassat nutaat. Aamma taakkua pilersaarutit malillugit 2023-ip naalernerani naammassissapput.

Munck Gruppen-imut sanatitsisup sanaartortussallu akornanni isumaqatigiissutit isumaqatigiissutiginerisa saniatigut Kalaallit Airports International A/S aammattaaq danskit naalagaaffiannut aamma Den Nordiske Investeringsbank-imut katillugit kr. 900 mio.-inik taarsigassarsinissamut inaarutaasumik isumaqatigiissuteqarpoq, taamaalilluni mittarfiliassat aningaasalersorneqarnissaat danskit naalakkersuisuisa, Naalakkersuisut aamma Kalaallit Airports International A/S-ip akornanni isumaqatigiissutigineqartoq inissitsinneqarluni.

*“Ingerlatseqatigiiffiup tungaaniit ukiut pingasut sinnerlugit annertuumik piaareersaalluni suliaqareernerup kingorna, sanaartornermik suliaqarnerit pimoorusamik aallartinnissaat qilanaarisorujussuarput. Sulisut siunnersuisartullu pikkorissut aammalu annertuumik aallussisut qanimut suleqatigalugit sulineq nuannersorujussuusimavoq, aammalu taamaaqataanik Munck Gruppen A/S-ip suleqatigilluarnerata ingerlaannarissaa qilanaaraarput. Munck Gruppen A/S peqatigalugu piffissami akigititamullu isumaqatigiissutigineqartumi suliaassat ingerlannissaat, aammalu suliaqarnerup ingerlanerani mittarfiup eqqaaniittunut akornutaasussat annikillissinnissaat, sulissutigissavarput, taamatullu suliaassat siumut ingerlanerat pillugu ingerlaavartumik paasisutissiisassalluta”, oqarpoq pisortaaneq Peter Wistoft.*

---

Kalaallit Airports International A/S · Imaneq 33 5.Sal · Box 2000 3900 Nuuk · Greenland

“A member of the Kalaallit Airports Group”  
“Del af Kalaallit Airports Koncernen”  
“Kalaallit Airports-ip Suliffeqarfiani immikkoortortaasoq”

\*\*\*

Tusagassiuutitigut nalunaarut manna pillugu saaffigineqarsinnaavoq  
pisortaaneq, Peter Wistoft, oqarasuaat +45 25 42 40 33.



13. august 2019

Pisortaqtigiit